

Faruk Selmanović
Zastupnik u Skupštini Kantona Sarajevo

Bosna i Hercegovina
Federacija Bosne i Hercegovine
Kanton Sarajevo
Skupština Kantona Sarajevo
n/r Kolegija Skupštine Kantona Sarajevo

Uputiti: Ministarstvu finansija Kantona Sarajevo i Ministarstvu kulture i sporta Kantona Sarajevo

INICIJATIVA

Na osnovu člana 213. Poslovnika Skupštine Kantona Sarajevo, upućujem inicijativu prema: Ministarstvo finansija Kantona Sarajevo i Ministarstvo kulture i sporta Kantona Sarajevo radi **hitnog obezbjeđenja i isplate sredstava** definisanih potpisanim ugovorima o sufinansiranju projekata **neprofitnih organizacija i udruženja iz oblasti kulture za 2025. godinu**, te donošenja odgovarajuće odluke kojom bi se omogućila puna realizacija ugovorenih obaveza Kantona Sarajevo.

Obrazloženje

Ministarstvo kulture i sporta je sa udruženjima i neprofitnim organizacijama zaključilo ugovore o sufinansiranju projekata za 2025. godinu, čime su stvorene jasne pravne, finansijske i budžetske obaveze Kantona Sarajevo.

Međutim, dio sredstava do danas nije realizovan ili je realizovan djelimično, čime su organizacije koje njeguju i baštine kulturno-historijsko naslijeđe dovedene u ozbiljnu finansijsku neizvjesnost. Time se direktno ugrožava njihov rad, opstanak projekata i kontinuitet kulturnog života Kantona Sarajevo.

Posebno zabrinjava činjenica da su projekti planirani i realizovani u toku 2025. godine, dok je budžetska godina istekla, a obaveze prema korisnicima sredstava ostale neizmirene, iako su iste preuzete potpisanim ugovorima.

Ovakva situacija nije samo administrativni problem, već predstavlja i pitanje zakonitosti izvršenja budžeta.

U skladu sa **Zakonom o izvršavanju Budžeta Kantona Sarajevo za 2025. godinu**, propisano je **članom 6.** da su budžetski korisnici dužni osigurati blagovremeno i zakonito izvršavanje preuzetih obaveza, također **članom 26.** je propisano da Ministarstvo finansija može izvršiti preraspodjelu ili obezbijediti dodatna sredstva radi izvršenja zakonskih i ugovornih obaveza; kao i **članom 28.** da se preuzete, a neizmirene obaveze mogu prenijeti i planirati u narednoj budžetskoj godini radi njihovog potpunog izvršenja.

Iz navedenog jasno proizlazi da Kanton Sarajevo ima zakonsku obavezu izvršiti preuzete ugovorne obaveze, te obezbijediti mehanizme (preraspodjela, rebalans ili prenos obaveza) kako bi sredstva bila isplaćena.

Stoga predlažem, da Ministarstvo finansija Kantona Sarajevo i Ministarstvo kulture i sporta Kantona Sarajevo:

1. Hitno obezbijede nedostajuća sredstva za izvršenje svih potpisanih ugovora;

2. Donesu novu ili dopunsku odluku (rebalans/preraspodjela/prenos obaveza) radi potpune realizacije transfera;
3. Izvrše isplatu preostalih sredstava korisnicima bez daljeg odlaganja;
4. Dostave Skupštini detaljan izvještaj sa spiskom svih udruženja, ugovorenim i realizovanim iznosima te rokovima konačne isplate.

Neprofitne organizacije iz oblasti kulture nisu budžetski „trošak“, nego čuvari identiteta, tradicije i kulturne memorije našeg društva. Neispunjavanje ugovornih i zakonskih obaveza prema njima direktno urušava povjerenje u institucije i dovodi u pitanje opstanak kulturnog sektora Kantona Sarajevo. Stoga je neophodno hitno postupanje nadležnih ministarstava.

S poštovanjem,
Faruk Selmanović
Zastupnik u Skupštini Kantona Sarajevo